

吳邑志卷第十二

水

城內古蹟

錦帆涇吳郡志云即城裏沿城濠也相傳吳王

錦帆以遊今濠故在亦通大舟盧志云在府治

官街西縱貫樂橋南北市郭俗傳吳王錦帆遊

樂於此今按市郭之中徒杠相望無容掛帆范

說是也又宋嘉定十年朝請大夫集賢殿脩撰

知平江軍府事趙彥櫛疏浚此涇以達運河橫

從四出凡開一千一百餘丈教授謝南作記其

文不存姑蘇志云即舊子城濠也在大街西直抵報恩寺亦非是

百花洲姑蘇志云在西城內胥盤二門之間夏駕湖吳郡志云在吳縣西城外吳王壽夢避暑駕遊於此故名今城下但存外濠即漕河也河西悉爲民田不復有湖

蛇門水附

宋承務郎胡舜申作議云吳城

以乾亥山爲主陽山是也山在城西北獨高爲衆山祖其餘回阜累累如群馬南馳皆其支隴城居隴前平夷如掌所謂勢來

形止全氣之地也如砥自城中觀之則城中之地亦唯而北最高是乾亥無疑乾爲天亥則紫微帝座所次是謂貴龍此城既土是山法當用金局乾亥於大五行屬金故也山既如此水則當與山相應此邦水勢自東南貪狼西南及正西武曲以至西北巨門等位來却由正北廉貞及正東東北祿存而去其來去無一不合金局之法故自古常爲大郡國而吳中人物繁夥所以常甲於東南今觀水之流亦常自閭盤

二門入即西南西北水也由葑婁齊三門
出即正北正東東北水也其於來去之法
固合然所以導迎善氣者尚有缺然蓋胥
塘自正西帝旺來是謂武曲之水本由胥
門入運河自吳江東南長生來是謂貪狼
之水本由蛇門入項歲乃塞胥蛇二門而
生旺之水遂不得朝向城中此其爲害明
陰陽風水者常嘆惜於斯胥塘之水尚由
閭盤二門委曲而入城東南長生之水乃
環城而東徑由葑門之外以去於城中了
不相關此尤可嘆惜故自項以來城中富
室無三世能保其居者按地里法生旺二
水利害最切今塞絕之明著者願圖四其
事復開二門導之入城以幸此邦可也胥
門適當姑蘇新館勢不可動又武曲但生
財富而已蛇門之水爲貪狼主文筆官職
之事於理爲重複開之便昔吳王闔閭始
作城伍子胥實規畫之立陸門八吳時欲
以絕越遂不開東南門即蛇門也不知塞
絕生氣故爲越所滅茲亦明效大驗至吳

晉李唐時諸門未嘗不開故晉唐時吳下
最爲雄盛今所啓門者五餘皆閉塞誠能
遠迹晉唐復關蛇門東南虛秀之氣疏導
迅發儒道利亨人物盛矣此議時旣不能
行舜申復爲後序告來者其文不傳

城外河渠

運河一名漕河在西城下其水自吳江來北流
入無錫界春秋傳稱吳城邦溝通江淮蓋吳王
夫差北伐齊時所開出師由此河以通江北也
世遠湮塞至隋煬帝大業六年敕開江南河自
京口至餘杭郡八百餘里面濶十餘丈擬通龍
舟巡會稽卽此此河自閶門北馬頭抵胥門館
驛長五六里東西兩岸居民櫛比而西岸尤盛
中途有一大灣水尤深廣昔嘗連西岸爲湖亦
名曰夏駕灣傳云吳王避暑處凡此河中荆襄
川蜀大船多於東泊鹽艋商賈則於西泊官舫
鈺鼓晝夜不絕綺羅簫管遊泛無禁蓋西閶之
盛自唐以來爲然刺史白公之詩言之詳矣至
冬尤多白鷗羣飛水面雪意陰風江鄉妙境也
自此過釣橋水北流由南濠至楓橋將十里人

煙相續而楓橋爲盛凡上江江北所到菽麥綿
花大貿易咸聚焉此皆屬吳縣界也凡水皆自
太湖流出自盤門至楓橋大小凡十一處今列
于左

經貫橫塘

橫貫南北之太塘也太湖中自

胥口東流至此十八里此爲塘之

中北抵楓涇南極鱸塘分流東出

故曰橫塘

綵雲港

自橫塘南北分流流出鱸塘楓

涇中出胥門塘也

出胥涇

自橫塘三里流出大橋東入運

河北流入婁江入海

楓涇

水自橫塘分支北流出楓橋入

運河東北流入婁江

鱸塘

自鮎魚口北至盤門入運河

小支居涇

新開河

二涇皆東流

普安涇

洞涇

白蓮涇

鳳凰涇

四涇皆北流

已上六支皆分橫塘入運河

瀕河衝要

潭

沙盆潭

在閭門外釣橋北會北濠南

濠上下之塘及山塘凡四流皆匯
此潭云沙益言盛廣深也水性湍
急諺云釣橋洪

洪 釣橋洪 其水甚急橋下兩傍甃石堤

為挽路水視風或南或北力絳而
度大舟至此皆拋紙錢必禱請云

埠 北馬頭 在南洞子門此處有官廳使

臣往來駟舟之所尤為繁盛

南馬頭 在胥門外館驛前三面石堤

成化九年丘侯霽作

驛 姑蘇館驛 有華樓對西山今廢

所 通運所 亦有樓今亦廢

橋 浮橋 原有船三十二隻亦廢今用小

官渡舡西華三鄉深不便之

亭 接官亭 在閶門外直西大街上前瞰

運河

市鎮楓橋地方 此處尤繁盛菽麥綿花商

船千百有寒山寺江村橋古蹟並

俯運河

石湖

石湖去城西南十里具區之委瀦也南北長九
里東西四里北屬吳縣界南屬吳江縣界周圍
二十六里民廬四匝雜植桃柳梅竹而湖居其
中其西滋起爲三峯吳王郊臺在焉

山

楞伽山

有寺寺內有五顯廟

茶磨山

如磨形也或云吳王郊臺非

古蹟越來溪

史記正義云越自松江北開

渠至橫山下東北入吳卽此溪按
松江卽今吳江越伐吳時吳有備
不得入故卽此山開渠通之渠一
夕而成遂滅吳吳郡志云越來溪
在越城東南越兵自此溪來入吳
故名今溪上越城雉堞尚存

橋亭行春橋

正跨湖口甚勝

望湖亭

在上方山上南見吳江塔尖

巖

觀音巖

石梁翠壁幽深竒絕

匯

彭山嶼

在西南上承太湖爲瀦

白洋灣

自胥口東出吳山之南匯于

此其水渺瀰折北瀦爲石湖

荷花蕩

亦曰黃山南蕩廣數百畝此

處夏間盛植荷蓮凡菱藕多出此

交 五丫义浜 五水合流是越來溪南口

村 紫薇村 在楞伽山下宋丁范居

太湖

太湖在邑西南五十里一名震澤按禹貢云震澤底定取水常震動之義或云震東方澤在東也一名具區周禮職方氏云揚州數曰具區爾雅亦云吳越之間有具區郭璞注今吳縣西南太湖也又越絕書云太湖周迴二萬六千頃古謂具區一名笠澤左氏傳云越伐吳吳子禦之

笠澤是也一名洞庭楊州記云太湖一名洞庭續圖經云太湖在吳縣西南吐吸江海包絡丹陽義興吳郡吳興之境故以太名焉吳郡志云太湖在吳縣西周五百里襟帶吳興毗陵諸縣界東南水都也姑蘇志云其中多山其西北爲山十有四馬跡最大其東爲山四十有一包山最大又東爲山十有七莫釐山最大今按此湖西首無錫東踰松江南負烏程北枕大吳其水發源有二一自西北宜興來一自長興山谿來邦從長橋水口流入吳松江又東流二百六十

里入海

山 包山

一名林屋山即洞庭西山在湖中居民數千家地占三鄉土產橘柚諸果有林屋洞天水經云太湖中有包山春秋謂之夫椒

莫釐山

一名莫里山一名胥毋山即洞庭東山居人數千家地占三鄉

五湖菱湖

顧夷吳地記云菱湖周迴三十里其口闊二里口南則莫里山北則徐侯山西與莫湖連洞庭實錄云吳王於此種菱故名盧志云菱湖東西九里南北五里三面沙岸連接上有人居

莫湖

顧夷記云莫湖在莫釐山西北與胥湖連周五十里洞庭記云莫

貢湖

湖當在莫釐山西北傍莫釐山因名顧記云在長山西其口濶四五里口東南長山南北連無錫老岸湖周迴一百九十里洞庭實錄云昔夏禹治水曾駐此故名

胥湖

顧記云在胥山西南與莫湖連周迴五六十里又陸廣微記云胥山繞胥湖東岸西臨胥湖有古子胥廟或云吳王殺子胥盛以鴟夷投諸江吳人爲立祠於江上號曰胥山即此也洞庭實錄云子胥於此得鱖設諸以見吳王後隱胥山故名

遊湖

顧云在長山東周迴五六十里西口闊二里東南岸樹里山西北岸長山洞庭實錄云吳王曾此遊翫故名

水口三江口

三江松江吳江東江也其水

口在吳邑東南三十里名三江口

一江西南上七十里至太湖曰松江

江古笠澤一江東南下七十里至

白蜺湖入海曰上江亦曰東江一

江東北下三百餘里入海曰下江

亦曰婁江

胥口

太湖之委自三江外其支流一

東出香山胥山之間曰胥口謂太湖東邊兩山對峙南曰胥山北曰香山中一水曰胥口

鮎魚口 自胥口東流北出此

古蹟投龍潭 在包山東滋按吳郡志云投

龍潭在龜山下蘇州志云林屋洞側有神景觀唐時歲遣使投龍醮祭即此處也洞庭記云東臯里湖在包山東昔吳越王嘗投簡祭禱洞仙水府龍王其簡以黃白金為之自唐迨宋歲為祀事

銷夏灣 吳郡志云在太湖西山之址山十餘里繞之舊傳吳王避暑處周圍湖水一灣也

石鏡 在長沙山舟行人物皆見之

磯 峯嶼磯 在三山南四里居湖中一名

峯嶼基按盧志云峯嶼山在吳縣西南十五里即獅子山越絕書云祚雄山故為鶴阜山禹遊天下引湖中柯山置之鶴阜更名祚雄山

俗說此山本在太湖中禹治水移
進近東又西南有小山皆有石如
拳芋云禹所用牽山也太湖中有
淺地長老云是芋萼山蹶自此以
東差深也言是牽山之溝吳郡志
云禹治水時令童男童女入太湖
引出此山欲以填水至鶴邑不肯
進因名鶴阜山

石塘西華石塘 在邑西南六十里其地類
湖環五千畝皆沃壤獨以無防止

水風浪日侵田不有年成化八年
秋霖雨彌旬而此處被蓄特甚知
縣雍泰躬履審視即命發夫本境
且採石傍近諸山以明年二月興
工不二月告成凡為石塘三千一
百丈有奇址廣一丈上收八尺高
八尺自東褚山望之所謂五十畝
者皆在所護其外湖壩之田加闢
得二百畝斥為新畬塘成而是夏
復澇西華之民芟耨自如學生吳

鳴翰請尚書王璵記雍嘗鑿穹窿
渠以溉上田又置三廂瀆水民多
賴之

附

宋元以來治水事蹟

太湖自宋以前莫考治法慶曆二年以松江風
濤漕運多敗官舟通判李商卿遂築長堤界于
松江太湖之間截五六十里熙寧三年廣東安
撫司機宜文字崑山郊置土言蘇州水利欲依
古法爲橫塘縱浦度用二十萬工要以三年而
畢五年十一月除鹽司農寺丞提舉兩浙興修
水利六年正月有旨罷役追奪元祐六年左朝
奉郎蘇軾自知杭州歸朝七月奏太湖之水溢
爲松江以入海海日兩潮潮水常欲淤塞江路
而江水隨輒滌去海口常通則吳中少水患昔
蘇州以東公私舡皆以篙行無陸挽者自慶曆
以來松江大築挽路建長橋以扼塞江路故今
吳中多水欲鑿挽路爲千橋以迅江勢遂繳進
將仕郎宜興單諤水利書事不果行元豐六年
樞密院裁定蘇州開江兵級八百人專治浦閘

政和元年提舉常平徐鑄脩松江隄易土以石
紹興二十四年九月大理寺丞周環請開白茅
塘泄太湖積水入海二十九年正月興工二月
奏畢工元大德二年中書奏立都水庸田司於
平江八年五月改行都水監至正元年立都水
庸田使司于平江以知渠堰事繫諸路州縣正
官衙二十年張氏開浚白茅壘鐵等塘

國朝永樂年間尚書夏原吉奉

命來治水䟽遏得宜民獲豐稔幾百年旣而七
浦人決去斜堰水不得東北流白茅淤塞弘治

四年五年七年江南連遭大水

詔以工部侍郎徐貫與巡撫何鑑專浚白茅乃
自芝塘抵海口凡長六千五百五十五丈開治
港面闊五十六丈傍深一丈七尺三閱月以成
告由是水道通行歲不告潦者累年皆以爲開
濬所致大凡以太湖爲要云

古水利論撮要三條

宋郊亶論一

昔禹之時震澤爲患東有堙阜

以隔截其流禹乃鑿斷堙阜流爲三江東入
于海而震澤始定震澤雖定而環湖之地尚

有二百餘里可田而地皆卑下且慮海潮往來一吳淞江不能吞吐乃於江之南北七里爲一縱浦使納海潮又於浦之東西十里爲一橫塘俟潮去而衝其勢制爲形碁布之其塘浦闊者三十餘丈狹者不下二十餘丈深者二三丈淺者不下一丈蓋欲取土以爲堤岸使高厚足以禦其湍悍之流故塘浦因而闊深水亦因之而流耳非專爲闊其塘浦以決積水也故堤岸高者湏及二丈低者不下一丈借令大水之年江湖之水高於民田五

七尺而堤岸尚出於塘浦之外三五尺至一丈故雖大水不能入於民田也民田既不容水則塘浦之水自高於江而江之水亦高於海不須決泄而水自湍流矣此古人浚三江治低田之法也

宋單諤論二 荆溪受宣歙江東數郡之水行

四十五里至震澤古人以溪流不足以勝奔注之勢復於震澤之上開瀆百條而摠謂之百瀆又開橫塘瀆一條綿亘四十里以貫百瀆而通下之湖中蓋橫塘直南北以經之百

瀆直東西以緯之既分荆溪之流下震澤又
由此抵松江而由江入海是以昔年未嘗有
水患而震澤亦不爲吳中害今荆溪受水不
少減而百瀆橫塘大半堙塞慶曆二年又以
松江風濤漕運多敗官舟遂接續築長堤界
於江湖之間隄東則江隄西則湖江之東即
大海而隄橫截江流五六十里又自松江至
海浦諸港復被沙泥漲塞茭蘆叢生隄傍亦
沙漲爲田由是三春霖雨則蘇湖常秀昔憂
彌漫

元潘應武論三

大湖受納三吳之水溢流而

下一下吳松江二百六十五里抵海一下急
水港五十里至澱山湖由港浦而入海錢氏
置撩淺軍四部七八千人宋亦相繼創水軍
專攻工役自後軍散營廢河港堙塞又吳江
長橋通長數十里舊係木橋立柱通徹湖水
入江曩時非不能運石築堤蓋作橋以泄湖
水衝激三江之潮淤故也今則壘石成堤雖
爲堅固而橋門窄狹不能通徹又被塘東占
種菱荷障碍難以衝激潮沙於是淤塞三江

致令水勢轉於東北迤邐流入崐山塘等處
由太倉劉家港入海

吳邑志卷第十二

吳邑志卷第十三

周漢以來古蹟

臺苑城郭 第宅 園亭 塚墓

臺苑城郭一 周至唐

姑蘇臺在縣西南三十里姑蘇山上吳王闔廬
作或云夫差作董覽吳地記云闔廬十一年起
臺於姑蘇山因山為名西南去國三十五里夫
差復高而飾之越伐吳焚之又云闔廬築臺高
三十丈吳王春夏游姑蘇臺秋冬遊館娃宮史
記正義云在吳縣西南三十里橫山西北麓姑

蘇山上按橫山即今踞湖山所謂西北麓姑蘇山者莫知其處或云即胥臺山是也或又云湖口胥山是姑蘇山今未知孰是宜兩存之若云在郊臺及茶磨山並僻繆不足取云今列他書可證者四焉吳越春秋云闔廬春夏治於城外姑蘇之臺巨食鮑山晝游蘇臺興樂石城走犬長洲一也越絕書云胥門外有九曲路闔廬造以遊姑蘇之臺以望太湖中閱百姓二也洞冥記云吳王夫差築姑蘇之臺三年乃成周旋詰屈橫亘五里三也山水記云姑蘇臺作五年乃

成高見三百里四也合而觀之踞湖姑蘇通一山耳西北乃墓家給辭諒矣

館娃宮吳王離宮也在縣西三十里硯石山上按董記云闔廬城西有山號硯石上有館娃宮方言云美女爲娃以貯西施故也今靈巖寺即其地有琴臺石室又有硯池皆故迹

吳王井二在硯石山腰一圓井日池也一八角井月池也穿石而下皆徑丈許有泉常清大旱不竭又有翫花池已堙塞莫知其所

采香徑在硯石山前吳王種香於香山使美人

泛舟於溪以采香故名之也

長洲苑在太湖北岸闔閭游獵處也孟康漢書註云江水洲爲苑

吳王魚城在橫山下吳王游姑蘇臺築此城以養魚今田間多高阜或斷或續是其遺跡

吳王酒城在魚城西南夫差築以釀酒此城周二千舉武今猶存西邊一堞高可二丈廣四丈長三十許丈俗呼爲城頭

越王城在石湖北越伐吳吳王在姑蘇臺越築此城逼之其遺基彷彿具在高者猶丈餘而墮

員不甚廣周回約計四百八十丈

越來溪起石湖東南至橫塘一帶皆是子胥亡後越自松江北沿橫山鑿溪入吳即此溪

州治本漢吳郡隋文帝開皇九年平陳改曰州十年州人沈玄檜圍刺史皇甫績於州城

帝命越國公楊素爲行軍總管平之十一年遂徙郡于橫山今新郭是也唐武德七年復自橫

山還故城或曰即越王城基

吳縣治楊素移向橫山東置今治平寺是其故址唐時隨郡徙歸城內

第宅二

相范蠡宅在太湖包山按范氏陶唐之裔公
滅吳范蠡乘扁舟浮五湖而居此者也故宅
在杜圻洲北地方十里多桑苧菜果又有大杏
云是陶朱公遺種又湖上有釣洲昔范蠡乘
至此遇風止釣於洲上刻石記焉其事見洞庭
記先賢傳述異記等書

漢用里先生宅在太湖中按周樹洞歷云用里
先生姓周名術字元道泰伯之後漢高帝時就
隱居者也包山西南有祿里村是其居處晉

多姓周蓋其子孫

吳將軍周瑜宅在武狀元坊內按漢建安三年
孫策爲瑜治第於吳卽此是也南宋時故井猶
存太尉周虎亦居此撰吳井記也

晉尚書令王珣宅在縣後日華里今景德寺

晉司徒何準宅在縣西北本捨爲般若臺俗云
朱明寺今廢 晉勾漏令葛洪宅在太湖烏石

山洪別傳云隱居於此壇井猶存

晉司空陸玩宅在今靈巖山寺

齊南兖州刺史陸慧暉宅在今承天寺

宋晉公丁謂宅在楞伽山下今名丁家山

宋贈太師范仲淹先宅在邑東北集祥里其先自唐及吳越之所居也舊有西齋皇祐初文正知杭州歸吳改爲歲寒堂遂廣其居以聚族人又買常稔田千畝贍之歲入八百斛公子忠宣右丞侍郎相繼益爲二千斛名之曰義宅咸淳十年判府替越友申中書省竊見先賢范文正公本郡人也過化之地無不尸祝獨本府未有專祠附庸學宮而已其於崇化勵實實爲闕典今卜義莊之東隙土爲屋六十楹以奉公祠乃

撥沒官田地收租未充祭費共祠密邇學道書院春秋二祀太守率僚屬親蒞及遇月朔則山長率諸生往拜脩敬今先擇其後一人爲掌祠若郡計稍舒則圖收教其子弟并以附於書院所合具申朝省照會伏候指揮是年九月尚書省劄下浙西提舉司照應本府施行自是入元祭祀不廢至正九年八世孫文英申請朝堂乞即祠建學遂改額曰文正書院而不設官仍命主祭者掌學事義莊田宅悉附天平山三太師墓所洪武間革去書院惟以爲祠堂成化十五

年巡按御史劉魁屬府鼎建

宋右承事郎賀方回宅在縣東昇平橋

宋尚書右丞葉夢得宅在鳳凰鄉魚城橋

宋信安郡王孟忠厚府在閭丘坊

宋禮部侍郎邊知白宅在金獅子巷

宋文靖魏了翁宅在縣東南三里府學後街文

靖蜀人其宅則理宗朝賜第平江者也其書院

曰鶴山者本在臨邛白鶴山下元文宗時曾孫

起以其祖實葬吳有居廬願襲舊額立祠建學

至順元年八月乙亥博士柯九思侍奎章閣以

請得可命侍書虞集題額賜之而世以主祭孫

掌其事洪武間山長書院既已革去其賜第遂

爲官有宣德五年侍郎周公忱來巡撫遂假以

出政後遂相因爲公府而祀典闕如成化中巡

撫彭韶公立神主來鶴樓下亦未有時享弘治

十年有以同姓好募具本請者事下禮部有大

臣左右之得覆奏如言然每當祭時必委曲不

便後雖鑿門其傍亦未爲允嘉靖三年七月巡

撫吳廷舉乃度樓後至干北垣以其中隙地作

堂塑像以爲祀所而以樓下展禮由樓而西又

南轉為重門扁曰祠堂又南至于外門扁曰書院遂與衙署中分焉理宗親書扁猶揭于公堂實則先朝之賜第也

元隱士俞琰宅在包山號林屋山人

山朝尚書郁新別業在橫山下有倚山堂

山朝尚書狀元吳寬宅在大街西有匏菴竹廳今存本籍長洲世居邑之樂橋里也

園亭三

吳越宋元至今

吳越錢氏南園在邑東南三里廣陵王元璿帥平吳日所治也按祥符圖經及文國志吳地直

知等書云在子城西南廣陵王帥吳時其子偕前指揮使文奉所創木皆合抱及其身見又累土為山亦成巖谷崇岡清池極其勝槩錢氏去國此園不泯祥符中知州秦義葺之以館使客其間臺榭中將時加脩飾每春縱士女遊觀長洲令王元之嘗來游愛而題詩欲他日功成而乞為醉鄉其勝可以想見至六觀末蔡京罷相東還詔以園賜之京又賦詩自慶曰議黃州之慕而不得也後歸張循王家今為府學餘地猶多藝蔬藥有遺風焉

宋集賢校理蘇舜欽滄浪亭在府學東故吳越
近戚孫承祐之池館也旣積土為山因以瀾水
瀾數十畝傍有小山高下曲折與水相縈帶或
云也古王僚所鑿也慶曆間舜欽以罪廢南遊
至吳僦舍以居適時盛夏思得高爽舒懷一日
過此顧樹鬱然崇丘廣水不翅城市並水得微
徑於花竹間東趨數百步有荒地約六十畝而
三面皆水傍無民居左右皆林木相虧蔽訪諸
舊老云孫氏館也坳隆勝槩道意尚存遂以錢
四萬得之構亭北碕號滄浪焉前竹後水澄川
翠幹光影會合戶軒間舜欽時榜小舟披琴書
以往則與魚鳥共樂如是者十年而終舜欽死
屢易主後屬丞相章敦家章本閩人而家吳中
所謂南北章者也其子增築山亭費買黃土錢
三萬貫園亭之勝甲於東南然章罷相即遷責
未嘗安享紹興初韓蘄王提兵過吳意甚欲之
章氏不悟即以隨軍轉運檄之章窘迫亟以爲
獻其家百口一日散居其最勝則滄浪亭也已
上出舜欽自記及石林詩話張魏公勤王記雲
衢談雋等書

宋宣教郎朱長文樂圃在邑西北一里故廣陵
王時諸子別建金谷園也錢氏去國易爲民居
更數姓矣慶曆中長文父光祿卿公綽始構得
之厥後稍廣西墻以益其地凡逾三十畝熙寧
末長文築垣結宇而居焉名之曰樂圃長文自
記云此地景趣質野若在巖谷圃中有堂及兩
廡以宅眷聚其南又爲堂命曰邃經邃經之東
有米廩蒙齋其西北隅有見山岡岡上有琴臺
臺之西隅有詠齋予嘗拊琴賦詩於此岡上有
池池中有魚白墨池展玩古今妙蹟處也池水
在前縈紆爲谿谿旁有釣渚釣渚與邃經堂相
直焉循岡北走度水爲西澗至于西圃圃有草
堂草堂之後有華巖菴草堂西南有土而高者
西丘其木則松檜梧栢黃楊冬青檜桐檉柳之
類叅雲合抱亦不可以殫書也其花卉則珍藤
幽藹高下相映蘭菊蒹葭藥錄所收不爲不多
又有桑柘麻紵果蔬梅李瓜瓠此其所有也予
於七圃朝則誦易春秋詩書夕則泛覽群史歷
觀百氏當其暇也陟高臨深種木灌園雖三事
之位不足以易吾樂也元豐三年十二月朔記

於時知州章岵表爲樂圃坊元絳程師孟廬輩
三大老俱有詩

宋叅政范成大石湖舊隱在橫山東成大創別
墅於此因越來溪故城爲亭榭有天鏡閣梅園
湖山勝絕氏族記云成大帥江東陛辭設宴孝
宗賜石湖二大字成大拜謝奉觴上壽乃退後
見東宮曰石湖已拜宸翰有壽櫟堂願得寶書
太子書三大字賜之成大乃刻兩朝御書於堂
上扁曰重奎今湖亭中一石猶存
宋尚書李彌大易老室在包山林屋洞前按彌

大紹興二年以顯謨閣直學士守平江菑郡不
越歲而罷以洞庭幽勝築室於靈祐觀東名室
以此彌大自作記今址存焉

宋推官張漢卿隱居在華山漢卿自仕途歸即
營此遂爲一時絕境尚書孫覲記云前宋元嘉
中張裕嘗居此山至是復爲張氏業也

元隱士俞琰石澗書隱在今府學西故有秋蟾
臺孫貞木復作詠春齋端居室玄孫振宗作九
芝堂今廢琰本居包山此其所徙也

元處士陳澂綠水園在孫老橋東故爲朱勳別

聖元至正中徵購得之高啓作詩序

國朝校官徐達左耕漁軒在光福鎮山下

塚墓四

吳太伯冢吳地記云在吳縣北去城十里

吳王僚墳在縣西一十二里岸嶠山西

吳王冢越絕書胥女大冢吳王不審名也去縣

四十五里 吳王夫差冢越絕書云在猶亭西

甲猷位越王以一塚葬之近太湖傍去縣十七

里吳越春秋云宰訖亦葬其傍

越王大塚在蒸山南不審石去縣三十五里

吳要離墓吳記云在泰伯廟南三百五十步

春秋澹臺滅明墓在縣西南八十里

漢太學生梁鴻墓在閭門外金昌亭傍一里

漢議郎臯伯通墳在胥門外

漢鬱林太守陸績墳在閭門外古太伯廟西

漢豫州刺史孫堅妻吳夫人及其子會稽太

守孫策三墓並在盤門外二里其事載吳地記

中有墓前有小溝曰陵浜祥符圖經云孫堅擲

鄉俗稱爲孫王墓按晉陽秋云惠帝元康中吳

令河東謝詢表爲孫氏二君置守冢五人修護

掃除有詔從之其文張俊所作今載文選宋政
和六年村民發墓甃皆作篆隸爲萬歲未歲四
字得金玉奇器甚多有銀栝初若繁花良文化
爲腐土并金搔頭十數枚金握臂二悉皆如新
一瓦熏爐與近世陸墓所制畧似而箱底仄崮
猶存碑石斷缺厯餘中平年三字守將遽命掩
之洪氏庚志云平江盤門外大塚紹熙二年秋
雨墮圮牧童入其間得銅器數種持賣於市鄉
人往視圮處其隧道有石刻隸書云大吳長沙
桓王之墓赤烏三年凡十二字知府沈揆命掩
塞之仍立石表其所嘉熙中墓傍土中又得唐
孫德琳墓志云開元十年窆于十四代祖吳武
烈皇帝陵東南平地於此爲益信云

吳侍中朱桓墳在橫山

吳偏將軍步騭墳在古縣西北三里一百步

吳左丞相陸凱墓在縣西鳳凰山

晉太尉陸玩墓在鷄籠山

晉司空何充墓在縣西十五里崖嶺山東一里

按史何氏過江自充以下並葬吳西山

晉東曹掾張翰墳在橫山東五里

晉吳國內史袁山松墳在橫山東二里

宋會稽內史張裕塚在華山

陳黃門侍郎顧野王墓陸記云在橫山東五里平地不起墳廬云一巨石徑可二丈許橫卧塚上餘石鱗次如圭壁上有古木范云顧野王墳在吳縣楞伽山下近越來溪有碑

唐太子太保陸象先墓在光福山西象先封充國公開元二十四年卒詔贈尚書左丞

吳越中吳節度廣陵王錢元璩及其子嗣節度威顯公文奉墓並在橫山錢氏有園日造薦福

寺於山下後人遂以寺名名山又墓傍有壽聖

院晉天福五年文奉建以奉廣陵墓祀初名吳山院至宋治平中賜名壽聖崇寧元年文奉孫公著立碑或云錢氏二墓並在橫山楞伽寺傍有墳祠號明因院今不知所在

宋太師魏國公范仲淹祖墓在太平山三讓原曾祖夢齡仕吳越爲蘇州糧料判官祖贊時童子出身終秘書監父墉從錢俶歸朝官武寧節度掌書記俱贈太師爵國公今稱三太師墓石山土穴周圍十里葬始唐麗水君也

宋贈特進虜文秀太子賓客盧革龍圖盧秉端
明廬法原四墓俱在穹窿山下

宋贈司徒富嚴墓在橫山寶華寺傍

宋光祿大夫程師孟墓在橫山下蘇舜欽銘

宋禮部侍郎蔣堂墓在橫山魯塢堯岵寺傍至

和元年葬胡宿撰神道碑

宋太尉鄭戰墓在橫山感慈塢

宋翰林學士錢藻墓在太平山下曾鞏銘

宋尚書左丞林希墓在橫山寶華寺傍

宋宣教郎龔明之墓在支硎山南峰

宋叅政范成大墓在太平山南上沙村舊有覺

嚴寺奉墓祀亦廢

宋贈太師謚正惠趙希憚墓在穹窿山

宋叅政魏了翁墓在高景山金盆塢嘉熙元年

葬直閣史繩祖撰神道碑

宋贈少師徐師閔墓在蒸山

元禮部尚書于文傳墓在閩門西鴈蕩村

元醫學教授曷應雷墓在鴈蕩村子乾孫祔

元都元帥魏國武宣公審玉墓在丹霞塢元初

鎮守長橋者乚子居仁廣東道宣慰使居正僉

行宣政院事昌言江南財賦司副使孫德謙奉
御伯讓淮南行省管勾俱衲窰河陽人子孫俱
家吳江今不聞矣因捨地府學有祠

元處士王鑑真定人至正二十六年有司買山
營葬在橫山下天台陳墓誌

元儒士邵光祖耿燁姚訢三墓在鄧尉山光祖
饒州人燁訢吳人皆篤學無嗣先後死無所歸
光福徐達左收葬之皆有名人作銘

元儒學提舉鄭元祐墓在橫山

國朝吏部尚書許思溫墓在石湖南桃花塢

國朝尚書楊翥墓在吳山長旗嶺下

國朝禮部侍郎金問墓在橫山

國朝右都御史韓雍墓在雅宜山

附

書院

社學

橋梁

學道書院在邑西北一里宋樞密趙順孫知平
江日以吳公子游常熟故里有祠而郡未嘗立
乃奏撥官地十三畝於此里前街創設甫經始
召去咸淳五年右文費鏞來嗣成之前爲門面
通衢內設先聖燕居殿專祠居殿後又西則講

堂齋舍教官聽事咸備大小屋計七十餘間北
抵雍熙寺街又以吳公子孫散處民間多失業
請爲書院教之賜扁曰學道又奏給田十頃設
山長二員主教事朔望奠謝以范公附中書舍
人陳宜中記元初釋教盛行總統楊璉真伽奉
旨立衙署於江南遂以書院爲僧錄司田之在
崑山州者亦爲攘奪山長金德修祖宗震共買
徐季子橋南高氏園堂奉安聖賢像粗存祭祀
儒職劉德到具詞聞有司轉達中書省送戶禮
二部議擬斷付原舊管業時德到上下懇訴始
得田租而書院雖在議乃爲雍熙寺所有寺僧
構結市民分佃居住後至元六年以前儒學教
授范文英來權書院事遂由儒司申行省檢照
得中書咨文委錄事司丈量交割山長程藻入
賄不克遷復據者益牢繼遭兵燹有司文牘悉
燬遂湮沒焉嘉靖五年知府胡纘宗按圖思復
舊蹟乃以邑後景德寺殿宇塑吳公其中又因
舊爲後堂齋舍以故名名之今所存者是也旣
自爲記又刻都臺公移于石以誌

社學在邑東北一里正統十三年有

詔設立府君朱勝建也府君以此地在城中心
為長吳交會爰構大堂及傍各兩齋齋聚百童
而教焉凡遇朔望躬親程校既拔其尤升於三
序餘則誨以孝經論語小學等書詩對算數以
為其業又聞長洲鄭鋼吳陳寬賢特以師禮聘
之天順元年府君去任至今民頌其德
都亭橋舊傳吳王壽夢於此作都亭以招賢士
故名則此橋春秋時已有之也
臯橋漢議郎臯伯通住處梁庾信及唐刺史白
樂天劉禹錫詩中皆見之則漢建

楓橋唐張繼有詩最知名

虹橋在閭門西跨越官河為喉襟要衝舊道以
木加甃歲久腐撓泰定元年夏大霖雨一夕盡
圯水陸並阻民吏憂駭郡內民人鄧文貴詣官
自言架木非久計請分家貲之半易之以石遂
以八月乙丑興工絕水下石作園空合洞狀是
年十月功成凡長四百尺其高三十二尺凡用
石統鈔十五萬貫黃潛虞集並有記

祠廟

宋文正范公忠烈廟在天平山下公以先世三

代皆葬此山嘗上請仁宗建功德寺因作祠其
右以奉薦羞至公子孫又作祠於祠南祀公然
忠烈之名未立自元昊請降西人皆爲公置生
祠宣和間宇文虛中爲慶帥言公功烈顯於西
土廟祀雖廢未有賜額徽宗特賜廟名曰忠烈
且爲之親題其扁凡廟之在西者皆易以新名
紹興以來關西皆陷忠烈之廟越在異邦蘇之
守令乃更謀作新廟于是山仍以忠烈名之每
歲上巳郡縣長吏率其屬致祭歲久廟壞至元
二十二年嗣孫邦瑞復新之末世兵燬神主移

高僧舍每遇時如子孫皆行禮廟下惟一古栢
挺立瓦礫間相顧而爭喬孫子易仕爲都察院
照磨每以其事訴於憲僚正統八年御史壽光
劉甄來巡鹽與巡撫侍郎周忱公議以克合委
吳縣令葉錫爲堂前後各三間以奉公及三世
塑像東西廡齋廬皆如制前爲大門榜曰忠烈
經始於是年九月閱兩月廟成是役也皆出官
僚資助以克有成碑陰載之

天平山白雲禪寺在范墓東唐時本一小院齊
曆二年白樂天爲刺史遊而詩之蓋因泉以興

寺也至宋范公之先皆葬其傍文正初仕淮南
或歸省墓多寓神主於此及官政府准條請賜
額爲今名今按前後碑記云東吳天平山天聖
六年浮屠擇梧始來是山時老屋十數簷乃寶
曆遣址梧經營爲巨刹慶曆四年文正以右諫
議大夫叅知政事於例先塋應得奏置功德寺
又准先降條普應寺院及屋五十間已上遇乾
元節並得賜額乃具劄子奏請名額中書門下
奉敕宜賜白雲爲額其山門住持擇梧初終五
十載畢力於此亦賜紫衣師號號寶諦大師厥
後忠宣繼志謀主者問之蘇公子瞻蘇以圃
田沙門法遠薦遂辟之所謂遠錄公也元末至
正二十六年寺燬無遺餘洪武七年住持性圭
再作大殿法堂寮舍舊規悉復

唐肅刺史祠原在府學內刺史諱應物貞元初
由左司郎中出爲此州政有惠愛州人立祠祀
之者也後吳越廣陵王作南園其祠適在界內
不歆廢斥存之迨范公營湖州學祠又當禮殿
之左亦重其來已久弗忍移徙即舊祠祀爲主
學主神歲時諸生以三月望日致祭名之曰集

賢太守歷代相沿用為茂舉宣德九年訓導韓
陽輩復新垣屋有記廟學既經某改祠亦漸小
而尊崇如一嘉靖四年有咎其自述詩者遷置
南禪寺非高平公之盛心也惜夫

吳邑志卷第十三